

Youq danhvei saehnieb ndawde, lauxsae moix bi miz baez bingz cizcwngh ndeu, baez neix youh daengz lo. Neix hawj gou siengj daengz laux Vangz.

Laux Vangz itcig cungj guh gijsaeh bauq bingz cizcwngh gauhgiz cunghyoz lauxsae. Hoeng, 11 bi gvaqbae lo, cungj bingz mbouj ndaej.

Bi’ gvaq hainduj, gij vwnzgen gvendaengz lauxsae cungh siujyoz bingz cizcwngh youh roengzdaeuj moq, laux Vangz sikhaek daeuj daengz bangunghsiz yaucangj bauqmingz, de yaek bauq gij cizcwngh gauhgiz cunghyoz lauxsae. Siuj Vangz boux youq bangunghsiz haenx couh caeuq de gangj riu: “Laux Vangz ah laux Vangz, gou dwg vih mwngz ndei cij naeuz gij vah neix, gou gienq mwngz gij cizcwngh neix mwngz couh mbouj yungh bingz lo. 11 bi neix daeuj, mwngz bibi lumj dozcaengh doek roengz raemx bae—— fouz mbouj hwnj bw. Mwngz lijdwg mbaetmbaet 800 maenz ngaenzbauqmingz neix bae cawx di ien cit roxnaeuz bae cawx geij bingz laeuj daeuj gwn cixbah. Danghnaeuz mwngz hawj dou cit gij ien mwngz, gwn gij laeuj mwngz, doeklaeng bungq daengz miz gijmaz saeh le, dou lij rox vih mwngz gangj gij coenz vah ndei bw.”

Bingz Cizcwngh

评职称

□ Veiz Buz / 韦朴

Laux Vangz lumj faexcenzreiz nei, rumz ci hix mbouj ning, fwn doek hix mbouj dumz, byaj raez hix mbouj lau. Seizneix, laux Vangz ngiengx-gyaеuj hawjdaeuj, naeuz: “Gij ngaenz-bauqmingz gou hix rox dwg 800 maenz ngaenz a! Hoeng, ce gij ngaenz neix roengzdaeuj gou hix mbouj fouq daengz gizlawz bae, vanzlij dawz bae bungqbungq seizheiq ba! Gangj mbouj dingh bineix gou seizheiq ndei, ndaej bingz hwnjbae!” Caen dwg ngwn lai lo, caen dwg hozoiq lai lo, lienz boux lwnyеz 3 bi cungj mbouj naeuz gij vah de deng, gou ndawsim baenzneix ngeix.

“Neix mbouj dwg bungq seizheiq lwi? Bingz cizcwngh lij aeu bungq seizheiq? Laux Vangz a laux Vangz, mwngz caen dwg faexnduk gaek mbouj baenz gij huqndei……” Gou danq gaemz heiq raezraez ndeu, dawz gonj

bit he youq gwnz daiz, naeuz: “Mwngz miz geij aen diuzgen mbouj habgek: Daih’ it, geijcib bi neix daeuj, gij cwngzciz mwngz itcig cungj mbouj ndei geijlai, gij ban mwngz son cungj baiz youq baihlaeng; daihngеih, mwngz sij gij cungjgez caeuq lwnvwnz lumj boux lwnyеz doeg siujyoz sij nei. Mwngz mbouj miz bien lwnvwnz lawz ndaej dwngh okdaeuj gvaq, engq mbouj yungh gangj sigiz、swngigiz、guekgyagiz; daihsam, mwngz diuh daengz cunghyoz raeuz, daengz seizneix, lienz swhgwzcwngh cunghyoz lauxsae cungj mbouj miz, neix dwg diuz ceiq youqgaenj lo! Mbouj yungh gangj gijwnq lo. Mwngz son saw mauhgvag 30 bi lo, coengzlaiz mbouj camgya saek baez goqgoeng’ hai gvaq! Youq aen yienh raeuz mbouj miz vunz rox gij mingzcoh mwngz……” Gou caeuq siuj Vangz gangj le, laux

Vangz deng gij vah dou moeb ndaej mwnh liux, lumj faexgoek nei ndwn youq henz.

Raen laux Vangz baenzneix, laux Lij yawj mbouj roengzbae lo, lienzmuengz daeuj bang de gangj vah, de naeuz: “Siuj Veiz, mbouj yungh yienghneix gangj ma! Gyoengq gwzming dungzci raeuz aeu fazyangz gij cingsaenz——it mbouj lau haemzhoj, ngeih mbouj lau mingh dai; lajmbwn mbouj miz maz saeh nanz, cij lau bouxvunz yunghsim bae guh. Lij miz dem, saetbaih ndaej roxhit bw !”

Gou hix naeuz: “Laux Vangz a! Gou mbouj dwg daegdaengq siengj gig aensim mwngz. Gizsaed, gou dwg bouxvunz aenbak lumj fagmid, aendungx lumj gaiq daeuhfouh! Mwngz mbouj yungh siengj lai!”

Laux Vangz doq riu dwk naeuz: “Gou rox gou rox, gij vah siuj Veiz dwg vahsaed. Mwngz yawjyawj bouxwnq, aeu vwnzbingz miz vwnz-bingz, aeu yozliz miz yozliz, aeu swhgwzcwngh lauxsae miz swhgwzcwngh lauxsae. Cij caj seizgan baez daengz, gyoengqde couh ndaej bingz hwnjbae lo. Hoeng, yienznaeuz gou yaek duiyouh, gou lij siengj caiq bungqbungq seizheiq, bae bingz aen cizcwngh daeuj yawjyawj……”

(caengz sat)



Miz song boux vunz doxduenq daengz gwnz bya bae ra gij rin ndeiyaewj, boux ndeu cang rin rim aenlaep, boux ndeu ndaw laep cij miz ndaek rin he de nyinhnaeuz ceiq ndeiyaewj. Boux cang rin rim aenlaep couh riu boux aeu ndaek rin he neix: “Mwngz vih gijmaz cij genj ndaek rin he?” Boux aeu ndaek rin dog neix dap: “Ndaek rin ndeiyaewj baenzfanh, gou genj aeu ndaek rin he gou nyinhnaeuz ceiq ndeiyaewj couh baenz lo.” Boux cang rin rim aenlaep dingq liux mbouj gangj gijmaz cij riu, laebdaeb aemq rin rim aenlaep roengz bya. Bouxlawz rox, de youq gwnz roen roengz bya seiz, gamjdaengz yied daeuj yied naek, doeklaeng mbouj miz banhfap lo, cijndaej itcig daj ndaw laep vut ndaek rin de nyinhnaeuz ceiq yakyawj okbae, daengz dinbya, ndaw laep de hix cij lw ndaek rin ndeu lo!



Byagijfungsanh funghgingjgih

60 nienzdaih, guek raeuz souh deng lai fuengmienh hangzhaep ciemqhah hongbing goenghai roxnaeuz raeblaeng haenx, daegbied dwg bi 1964 ndwen 5 gvaqlaeng, youq cingzgyang Meij、Suh song guek gyagaenj hongbing hangzhaep guek raeuz lajde, hwnjguh baihlaeng canloz (sibgvenq heuh hwnjguh “sam sienq gensez”) deng baij hwnj gij lwnhsaeh youqgaenj goengdaeuz ngoenznaengz gak gaep bae.

Ciuq gij anbaiz giva guekgya, gij dieg baihsaebaek Guengjsae, dwg dieg gvaengh “sam sienq”. Veiz Gozcingh ca ndei aen seizndei neix, camceng guekgya youq gij dieg baihsaebaek Guengjsae anbaiz buek hanghmoeg moq ndeu, ndawde miz goengloh guekfuengz, miz dietloh, caemhcaiq miz gij giyez cangigvang dem. Gij hanghmoeg neix guh baenz le, gaijndei le gij yiengh baijbouh gunghyеz Guengjsae, coicaenh le ginghci dieg baihsaebaek Guengjsae

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz

fazcanj, gyagiengz le gij rengz henre henzgyaiq guekgya.

Ciuhgeq hoenxcienq, dwg bingmax caengz ning, haeux nywj doengh gonq. Seizneix hwnjguh gensez, dwg gunghcangj caengz guh, dienhlig yaek miz gonq. Youq gij dieg baihsaebaek Guengjsae gyaudoeng mbouj bienh、dienhlig youh noix guh baenzlai hanghmoeg, baenzlawz gaij-gez yungh dienh dwg aen saeh laux gaenjcieng ndeu. Seizhaenx, boux goengdaeuz gaem bumwnz dienhraemx swcigih Cai Yungjveiz daengj vunz, ginggvaq caeuq canghhag

ngeixyaeng, daezok aen fueng’ anq haifat Camhfatdienh Gaepmbaek Lungzgyangh.

Lungzgyangh dwg diuz dahnga cujyau Dahliujgyangh ndeu, daj gij diegbya Yienh Liboh、Yienh Sanhduh Swngj Gveicouh lae ok, riengz Yienh Nanzdanh、Vanzgyangh lae daengz Hozciz、Yizsanh, youh daj gizneix laebdaeb lae coh baihlaj, youq Cin Fungsanh Yienh Liujcwngh caeuq Dahyungzgyangh doxgap, doeklaeng lae haeuj Liujgyangh. Caeux youq 60 nienzdaih geizco, Yendagrau Dienhraemx Guengjsae daengj danvih,

gaenq guh gvaq hong maeuzveh hawj dieglae Dahlungzgyangh. Dangjveij caeuq Cwngfuj Swcigih ginggvaq ngeixyaeng lai baez, nyinhnaeuz Lungzgyangh raemx doekca sengcingz hung, deng dumh sonjsaet noix, diuzgienh haifat ndei lai, caemhcaiq lae gvaq gij dieg gyang dieg Hozciz, doiq gaijgez hwnjguh “sam sienq gensez” yungh dienh mizleih, yienghneix couh gietdingh yungh aen fueng’ anq haifat Camhfatdienh Gaepmbaek Lungzgyangh neix.

(caengz sat)